

զամենայն զգաւրս իւր եւ զմեծամեծս իւր եւ զփոքունս եւ զամենայն մարդիկ աշխարհին իւրոյ՝ որ ինքն իշխեր, եւ ի մեջ ամբոխին ածել զտիկինն Յայոց զՓառանձեմն: 46 Եւ հրամայեաց ի հրապարակին իմն առնել հրապոյրս մեքենայից, որով հրամայեաց զկինն արկանել, եւ արձակել տիկնոջն Փառանձեմայ ի խառնակութիւն պոռնկութեանն անասնական պղծութեանն: 47 Այսպէս սատակեցին զտիկինն զՓառանձեմ: Իսկ զայլ գերին զամենայն տարան բնակեցուցին, որ յԱսորեստան, որ յերկրին Խուժաստանի:

ԳԼՈՒԽ ԾԶ.

1 Յաղագս վկայութեանն Չուրթայ երիցու յերկրին Պարսից:

2 Ապա իբրեւ չոգան տարան յերկիրն Պարսից զամենայն գերութիւն Յայոց, եւ զՉուրթ երեց Արտաշատ քաղաքի ունեին կապանաւք առաջի թագաւորին Պարսից Շապոյ: 3 Եւ նայէր թագաւորն Պարսից Շապուհ, եւ տեսաներ զերեցն Չուրթ այր բարձր եւ անձնեայ, եւ ի տիրոց մանուկ. եւ հեր գլխոյն ակնորեալ էին, այլ մուրուքն դեռ տակաւին սեաւ եւս կային: 4 Ապա յորժամ զառաջինն խաւսել սկսաւ, ասէ. Եթէ տեսանէ՞ք զառնդ զայդր զչարութիւն. քանզի յայտ է, ի հերաց այտի երեւի՝ թէ կախարդ է. զի հերքն սպիտակ են, եւ մուրուքն սեաւ: 5 Իսկ երիցուն տուեալ պատասխանի՝ ասէ. Թէ քեզ պետ իցէ, այլ զինչ կամիս խաւսել եւ առնել՝ խաւսեաց. այլ վասն այդորիկ գիտեա, զի յիրաւունս սպիտակեցեալ են նախ հերքս. զի բազում աւուրքք երեց են, գոնեա՛ հնգետասան ամաւք քան զմուրուս նախարոյս են: 6 Իսկ թագաւորն հրաման տայր մինչեւ ի վաղիւն պահել զնա. իսկ ի վաղիւն հրաման տայր ածել ի հրապարակն շղթայիւք: 7 Եւ ելին ոստիկանք արքունի հարցանել, եթէ իցէ՝ յանձն առցէ պաշտել զաւրէնս մոգութեանն, ոչ մեռցի: 8 Իսկ նա ոչ առնոյր յանձն. այլ կամեցեալ մեռանել խնդութեամբ վասն Աստուծոյ, երթեալ ի տեղի մահուան, եւ աղաչեաց զվերակացուս իւրոյ մահուանն, զի թողացուցեն նմա սակաւ մի կալ յաղաւթս: 9 Եւ մատուցեալ յառաջագոյն, եղ ծունր եւ ասէ:

ԳԼՈՒԽ ԾԷ.

1 Աղաւթք ի ժամ մահուն Չուրթայ:

2 Արարիչ մեր, որ արարեր զերկինս եւ զերկիր եւ զծով յոչընչէ, եւ ստեղծեր զմեզ ի հողոյ, եւ զհողեղէնս այսպէս իմաստունս բանաւորս եւ կենդանիս արարեր: 3 Եւ շնորհեցեր մեզ զգիտութիւն քո, զոր ցուցեր ազգաց որդւոց մարդկան ի ձեռն սրբոց քոց մարգարեիցն կարապետացն քոց. եւ դու քեզէն եկիր իջեր մարդացար երեւեցար յերկրի, եւ ընդ մարդկան շրջեցար. եւ զկատարեալ իմաստութիւնդ քո շնորհեցեր արարածոց քոց, զոր Առաքելովքն քարոզեցեր քոց ստացուածոց յաշխարհի: 4 Եւ վարդապետաւքն սրբովք,